

14.11.2017

## **Mätt'tõsminister da sää'mnuõr: Sää'mkiõli seeiltummuš da jeältummuš lij õhttsaž ä'sšem**

*Sää'mkiõl da kulttuur ánn'jõžvue'jj pirr saaggstõ'lleš tä'bbe He'lsnest, ko mätt'tõsminister Sanni Grahn-Laasonen kaaunõõdi sää'mnuõrivui'm. Nuõr mušttle mätt'tõsministeera jii'jjez kiõččlástmõõžzi pirr jeä'rbi mie'ldd sää'mkiõl mätt'tõõttmest, kiõl miárktõõzzást jii'jjez identitetta, kiõl mõõntummšest da tøn mãåust vä'lddmest di sää'mkiõli sâá'jest da ánn'jõžvue'jjest.*

Sää'mnuõrin lij ra'vves tätt õõu'deed sää'mkiõl da kulttuur sâá'j da jie'llemviõkksažvuõđ. Tuäivvap, što riikk vä'sttad tän ta'rbbe, što pue'ttiäi'jest vä'žžtõõzzid háaidčeš õõutveákka kõrrsab taa'rmin ko oudđâl, sää'mnuõr tue'tte dialoog looppâst.

Mätt'tõsminister da nuõr saaggstõ'lle jeä'rbi mie'ldd sää'mkiõli mätt'tõõzz kuõskki kõõččmõõžzin sä'mmlai dommvuu'dest da tøn áalgpeä'lnn. Täävtõssân leäi láá'zzted fi'ttjõõzz sää'mkiõli da kulttuur vaarvuâlaž sâá'jest di saaggstõõllâd sää'mkiõli seeiltummšest da jeältummšest. Täävtõssân leäi še vuâđdeed sä'mmlai da Lää'ddjânnam kõskksaž suävâdvuõttprosee'ss valmštõõllmõõžž sää'mnuõri kiõččâmkuu'limest.

- Jiijâs kiõl da kulttuur kâddmõš lij samai väážnai, što kulttuurä'rbbe da kiõll serddje õõudârra. Jie'nnkiõll lij tõt neävv, koin mee'st juõ'kkkaž mušttal vuõss-sâjjsânji jii'jjes jurddji da tobddji pirr. Lij fiin ä'sš, mä'htt nuõrr puõlv á'ne äärvast da tätta seeilted da staaned jiijâz kiõl da kulttuurää'rb juátkkjemvuõđ. Mij õlggâp õõutveákka oocčâd čõõđ ääi'j odđ čâuddmõõžžid sää'mkiõl mätt'tõõzz õõu'dummuž väaras, mätt'tõsminister **Sanni Grahn-Laasonen** ceálkk.

Vuõiggâdvuõttministeria da Sää'mtee'ĝĝ Nuõrisuávtõs rie'sše õõutveákka vuârrmainstummuž da tõõzz vuässõ'tte mätt'tõsministeer, Sää'mtee'ĝĝ Nuõrisuávtõõzz da Lää'ddjânnam Sää'mnuõr rõ ee'ttkõ'stjii láá'ssen jeä'rbi mie'ldd Sää'mtee'ĝĝ saaggjää'dteei Tiina Sanila-Aikio da riikkpiisar Paula Lehtomäki riikksuávtõõzz pravlee'nn'jast. Saaggstõõllmõõžž le'jje seu'rre'mmen še riikkpeei'vi vuâđdlää'kkvälljkää'dd da čuõvtõsvälljkää'dd, Päärnaiä'sšoummu da Ooumažvuõiggâdvuõttlett rõ ee'ttkõ'stjii.

Sä'mmla lie Euroopp unioon vuu'd o'dinakai alggmeer. Lää'ddjânnmest, Taarâst, Ruõccâst da Ruõššjânnmest lie nu'tt 100 000 sä'mmli'žžed, koin Lää'ddjânnmest jâlste 10 500. See'st nu'tt pie'll maainast jie'nnkiõllân koon-ne kooum Lää'ddjânnmest mainstum sää'mkiõlâst: aanrõškiõl, nuõrttsää'm- le'be tä'vvsää'mkiõl. Lää'ddjânnam sä'mmlain pâ'jjel pie'll da vuâlla 10-ákksaž sää'mpäärnain nu'tt 70 prose'ntted jâlste ánn'jõžääi'j sä'mmlai dommvuu'd áalgpeä'lnn. Sä'mmlai dommvuu'd áalgpeä'lnn jâlstei nu'tt 2000 sää'mpäärnast da -nuõrâst nu'tt 50 vuäžža sää'mkiõllsaž oudđpeämm da nu'tt 100 vuäžža sää'mkiõl mätt'tõõzz.

Šõõdmõš leäi vue'ss vuõiggâdvuõttministeria koordinâ'sttem *Lää'ddjânnam 100 – Lää'dd demokratia pue'ttiäi'ĝĝsaaggstõõllmõõžž* -ha'ñkkõõzz, koon vä'lddtäävtõssân lij vue'ssen Lää'ddjânnam 100 -juhllee'jj prograamm pu'htted ou'dde dialooglažvuõđ tuäimmi demokratia

vuáddõõlgtõssân di kaunnâd oddâ naa'lid nââneeï õhttsažkâáddlaž saaggstõõllmõ'sše.  
Vuõiggâdvuõttministeria ha'ñkkõskuei'm lie Sitra, riikksuávtõõzz pravlee'nn'ja Lää'ddjânnam 100 -  
piisarkâ'dd di riikkvääraiministeria.

### **Lââ'ssteâd:**

jää'dteei Johanna Suurpää, vuõiggâdvuõttministeria, te'l. 0295 150534,  
[ristnõmm.sokknõmm@om.fi](mailto:ristnõmm.sokknõmm@om.fi) (sä'mmlai vuõiggâdvuõđ)

mätt'tõsduumšek Anne Onnela, mätt'tõs- da kulttuurministeria, te'l. 0295 330010,  
[ristnõmm.sokknõmm@minedu.fi](mailto:ristnõmm.sokknõmm@minedu.fi) (sää'mkiõli mätt'tõs da jeáltummuš)

saaggjää'dteei Laura Pieski, Sää'mtee'ğğ Nuõrisuávtõs, te'l. 040 6837900,  
[ristnõmm.sokknõmm@windowslive.com](mailto:ristnõmm.sokknõmm@windowslive.com)

proje'ktjää'dteei Liisa Männistö, vuõiggâdvuõttministeria, te'l. 0295 150231,  
[ristnõmm.sokknõmm@om.fi](mailto:ristnõmm.sokknõmm@om.fi) (Lää'ddjânnam 100 -ha'ñkkõs)

### **Loogg lââ'zz:**

Sää'mää'sš vuõiggâdvuõttministeria interne'ttseeidain (lääddas)  
(<http://oikeusministerio.fi/saamelaisasiat>)

Sää'mtee'ğğ interne'ttseeid ([www.samediggi.fi](http://www.samediggi.fi))

Sää'mtee'ğğ Nuõrisuávtõõzz interne'ttseeid (<http://www.samediggi.fi/nuorat/>)

Lää'ddjânnam 100 – Lää'dd demokratia pue'ttiäi'ğğsaaggstõõllmõõžž -ha'ñkkõs  
(<http://oikeusministerio.fi/demokratian-tulevaisuuskeskustelut>)

Riikksuávtõõzz teádtõs 19.10.2017 suávdvuõttkomissio valmstõõllâm alttum്മest  
([http://valtioneuvosto.fi/artikkeli/-/asset\\_publisher/10616/hallitus-kaynnistaa-saamelaisten-  
sovintokomission-valmistelu](http://valtioneuvosto.fi/artikkeli/-/asset_publisher/10616/hallitus-kaynnistaa-saamelaisten-<br/>sovintokomission-valmistelu))